

Nunatsinni ujaqqanik pinnerasaasiassanik aatsitassanillu katersisinnaanermut kiisalu annikitsumik aatsitassarsiorluni ujaqqanik piiaanissamut akuersissummik tunniussinissamut inatsisitigut immikkut aalajangersaanissamut UPA 2017-imi suliniuteqaqqullugit Naalakkersuisut inatsisartut aalajangiiffigisassaattut siunnersuut
(Inatsisartunut ilaasortaq Anthon Frederiksen, Parti Naleraq)

Akissuteqaat

(Aningaasaqarnermut Aatsitassanullu Naalakkersuisoq)

Siullermeerneqarnera

Ujaqqat pinnerasaasiassat Kalaallit Nunaanneersut sammineqaqqinnissaannut periarfissamut matumunnga Naalakkersuisut qujapput. Nunatsinni eqqumiitsulianik kusanartuliortartut pikkorissut annikitsumik aatsitassarsiornissamut maleruagassat ataanni ujaqqanik pinnerasaasiassanik piiaanissamut pitsaanerusumik atugassaqartinneqartariaqartut Naalakkersuisut siunnersuuteqartoq isumaqatigaat.

Taamaattumik annikitsumik aatsitassarsiornissamut maleruagassat misissoqqissaarlugit Naalakkersuisut aallartereermata, siunnersuuteqartoq nalunaarfigisinnaagakku nuannaarutigaa. Tassunga atatillugu aamma ujaqqanut pinnerasaasiassanut – aatsitassanik akisuunik taaneqartartunut - tunngatillugu maleruagassat aamma misissuataarneqassapput. Siunnersuuteqartup 2017-imi upernaakkut ataatsimiinnermi inatsisissatut siunnersuummik saqqummiussisoqassasoq siunnersuutigaa. Naalakkersuisut 2016-imi ukiaanerani ataatsimiinnermi aatsitassanut ikummatissanullu inatsimmut allannguutissatut siunnersuummik saqqummiussilersaalereermata nuannaarutigisorujussuullugu nalunaarutigisinnaavara.

Allannguuteqartitsineq aatsitassanut ikummatissanullu inatsimmut attuumassuteqanngitsumik ujaqqanut pinnerasaasiassanut immikkut inatsisitut pissasoq siunnersuuteqartup siunnersuutigaa. Tamanna Naalakkersuisut isumaqatiginngilaat. Eqqaamassavarput annikitsumik aatsitassarsiornissamut maleruagassat innuttaasut nalinginnaasut eqqarsaatigalugit atuutsinneqarmata. Taamaattumik maleruagassat pisariaqanngitsumik pisariusuutinneqannginnissaat aalajangiisuulluinnartumik pingaaruteqarpoq. Naalakkersuisut isumaqarput aatsitassanut ikummatissanullu inatsimmut ataasiinnarmut innuttaasut isummorsinnaassappata tamanna ajornannginnerussasoq. Siunnersuuteqartup siunnersuutaa tunngavigalugu innuttaasoq aatsitassanut ikummatissanullu inatsimmut aammalu ujaqqanut pinnerasaasiassanut inatsimmut isummersortussaassapput.

Innuttaasut nalinginnaasut akornanni annikitsumik aatsitassarsiornermut suliassaqarfimmut atituumik soqutiginnilersitsinissaq Naalakkersuisut sulissutigaa. Tamatuma saniatigut ujaqqanut pinnerasaasiassanut Kalaallit Nunaanneersunut nunanit allamiut soqutiginnilersinnissaat Naalakkersuisut aamma sulissutigaa. Nunani tamalaaneersunut suliqaartunut tunngatillugu, kisianni pingaartumik uagut nammineq innuttatsinnut tunngatillugu, maleruagassat sapinngisamik pisariinnerpaajusariaqarput. Naalakkersuisut isumaqarput tamanna, aatsitassanut suliassaqarfimmi tamarmiusumi maleruagassiiviusumik, ataasiinnarmik aatsitassanut ikummatissanullu inatsiseqarnikkut pitsaanerpaamik aaqqiivigisinnaagipput.

Ujaqqanut pinneraasiassanut Kalaallit Nunaanneersunut soqutiginninneq annertusiartortoq siunnersuuteqartoq ilumoorpoq. 2016-imi martsimi Kalaallit Nunaanni annikitsumik aatsitassarsiornissamut akuersissutit 38-iupput. Tamatuma saniatigut Qeqertarsuatsiaat eqqaanni rubinisorfissaq ukioq manna tunisassiulissasoq naatsorsuutigineqarpoq. Taamaalilluta ujaqqanut pinneraasiassanut, innuttaasut akornanni aammalu ingerlatseqatigiiffiit anginerusut akornanni, soqutiginninneq annertusiartortoq takusinnaavarput. Annertusiartornera taanna Naalakkersuisut Kalaallit Nunaata nunatut aatsitassarsiornermik periarfissaqarfiusutut maani nunatsinni aammalu nunani allani nittarsaallugu siunnerfilimmik sulissutiginninnerisa inerneraa. Annikitsumik aatsitassarsiornissamut pisinnaatitsissummik pigisaqartut aamma Kalaallit Nunaat nittarsaallugu annertooujussuarmik suliaqarput – tamatumunnga nersualaarneqartariaqarput.

Aatsitassanut ikummatissanullu inatsisip, ilanngullugu annikitsumik aatsitassarsiornermut suliaasaqarfimmi, pitsanngorsaalluni iluatsilluartumik ingerlanerup taassuma inerisaqqinnissaa Naalakkersuisut kissaatigaat. Ullumikkut annikitsumik aatsitassarsiornermut suliaasaqarfik immikkut aatsitassanut ikummatissanullu inatsimmi kapitali 8-imi inatsisitigut maleruagassaqartinneqarpoq. Taamaalilluni aatsitassanut ikummatissanullu inatsimmi kapitali immikkoorluinnartoq, annikitsumik aatsitassarsiornermut maleruagassanuinaq tunngassuteqarpoq. Maleruagassat taakkua Naalakkersuisut maannakkorpiaq pitsanngorsarlugit suliaqarput. Tamatuma saniatigut ujaqqanut pinneraasiassanut – aatsitassanik akisuunik taaneqartartunut - tunngatillugu aatsitassanut ikummatissanullu inatsimmi pitsanngorsaanernik suliaqarnissaq Naalakkersuisut kissaatigaat. Allanguuteqartitsinermi ilaatigut innuttaasut ujaqqanik pinneraasiassanik katersisarnissaat avammullu tuniniaasarnissaat ajornannginnerulersinneqassaaq. Tamanna pillugu ukioq manna ukiaanerani ataatsimiinnermi siunnersuummik saqqummiussinissamut Naalakkersuisut qilanaarput.

Naalakkersuisut neriuutigaa aatsitassanut ikummatissanullu inatsimmut atuutereersumut allanguutissatut siunnersuut siunnersuuteqartup ukiamut tapersersorumaaraa, taamaalilluta ataatsimoorluta nunatsinni eqqumiitsulianik kusanartuliortartut pikkorissut sulinissamut atugassarisaannik pitsanngorsaasinnaassalluta.

Taamatut oqaaseqarlutik Naalakkersuisut siunnersuut itigartinneqassasoq inassutigaa.